

朱子大全

冊五

卷

之

序

一

一

晦庵先生朱文公文集卷第六

詩

和人游西巖

平生壯志浩無窮老寄寒泉亂石中
閑去披襟弄清泚靜來合眼聽玲瓏
不知澗寺晴時雨何似溪亭落處風
吟罷君詩自瀟灑此心端不限西東

次知郡章丈遊山之韻

前峯鸞鶴去無蹤邂逅荒尋得故宮
但覺風烟隨意好便驚塵土轉頭空
提壺命駕幽期遠授簡哦詩妙處同
安得西山一丸藥共隨簫鼓向雲中

題周氏溪園三首

循澗闢芳園結亭對虛壁澄潭俯幽鑿
空翠仰寒滴主人心事遠妙寄塵壤隔
豈爲功名期而忘此泉石溪亭

危亭竹柏間
悄悄日幽絕
朔風一以厲
愛此枝上雪
仰悲玄景駛
俯歎羣芳歇
不用此時來
那知歲寒節
雪亭主人
手種籬間樹
枝繁不忍刪
新亭最佳處
勝日共歡顏
景晏春紅淺
雨餘寒翠潛
光風回巧笑
桃李任漫山
嫣然亭

寄林擇之

故人千里寄書來
三復塵襟頓豁開
勸我從容深燕養
莫將佔畢苦沉埋
杖藜此日應同趣
揮麈何時得共陪
珍重相期俱努力
自慙殊未竭淵才

送林擇之還鄉赴選三首

青驪去路欲駸駸
回首猶須話此心
一別便成三數月
有疑誰講過誰箴

門外槐花似欲黃
高堂應望促歸裝
箇中自有超然處
肯學兒曹一例忙

今朝握手送君歸馬上薰風拂面吹不用丁寧防曲學寒
窓久矣共心期

題林擇之欣木亭

危亭俯清川登覽自晨暮佳哉陽春節看此隔溪樹連林
爭秀發生意各呈露大化本無言此心誰與晤真驩水菽
外一笑和樂孺聊復共徜徉殊形乃同趣

擇之誦所賦擬呂子進元宵詩因用元韻二首

何處元宵好山房入定僧往來衣上月明暗佛前燈實際
徒勞說空華詎可憑還教知此意妙用一時興

何處元宵好寒龕獨寐人月窓同皎皎燈鏡自塵塵靜鑒
通天地潛思妙鬼神却憐迷路子狂走鬧城闐

次韻擇之梧竹二首并呈季通

竹塢深深處檀欒遶舍青暑風成慘淡寒月助清冷客去

空塵榻詩來拓采樵此君同一笑午夢頓能醒

永日長梧下清陰小院幽自憐風嫋嫋客賦雨瀏瀏作別
今千里相思欲九秋更憐同社友復此誤淹留

擇之寄示深卿唱和烏石南湖佳句輒次元韻三

首

未識南湖景遙欣二子遊賞心并勝日妙語逼清秋賸欲
攜書卷相將買釣舟微吟歸去晚杜若滿汀洲

平湖渺空闊積水暮生寒但見綠千頃不知深幾竿人間
元迫隘世路足艱難若了滄洲趣無勞正眼看

年來年去爲誰忙三伏炎蒸忽變涼閱世謾勞心悄悄懷
人空得鬢蒼蒼詩篇眼界何終極道學心期未遽央安得
追尋二子舞雩風月共徜徉

小詩奉送擇之仁友赴漕臺之招後篇喜趙公之

得士而不敢致私怨焉然別懷黯然不能成章亦
足以見區區也二首

之子論交久深衷兩自知提攜方有賴離索遽成悲聖處
應無數書來肯見私臨分莫惆悵努力共心期

珍重東臺老英聲舊所聞能懷吐哺意豈但枉書勤得士
看如許持心定不羣願言推此志清濁見朋分

擇之賢友歸途左顧示以四明酬唱煥爛盈編三
復咏嘆相見聚遊之樂輒用黃山卽事之韻賦呈
擇之兼懷子重老兄順之賢友

十年身臥白雲堆已分黃塵斷往回不是幽人遺俗去肯
尋流水渡關來三秋風月從頭說千里湖山覲面開久欲
過逢須一快豈知勞結倍難裁

夜聞擇之誦師會題畫絕句遐想高致偶成小詩

一幅瀟湘不易求
新詩誰遣送閑愁
遙知水遠天長外
更有離騷極目秋

次林擴之開善避暑韻二首

炎官虐炤遍山村
也到蕭蕭柳下門
水玉秋菰那可得
羨君行處午陰繁

山齋幾日旱塵昏
欲拂朱絃已憚煩
涼意感君持寄我
雨聲花思滿曾存

送林熙之詩五首

君行往返一千里
過我屏山山下村
濁酒寒燈靜相對
論心直欲到忘言

仁體難明君所疑
欲求直截轉支離
聖言妙蘊無窮意
涵泳從容只自知

天理生生本不窮
要從知覺驗流通
若知體用元無間
始

笑前來說異同

十年燈火與君同
誰道年來西復東
不學世情雲雨手
從教人事馬牛風

古鏡重磨要古方
眼明偏與日爭光
明明直照吾家路
莫指并州作故鄉

春雪用韓昌黎韻同彭應之作

既有陽春曲那無白雪謠
連天飛不斷著地煖還銷
未掩高人戶難齊衲子腰
稍開銀世界漸長玉枝條
興盡愁煙艇行迷認野橋
酒腸渾欲凍吟筆爲誰搖
殘臘成三白餘寒又一朝
香隨梅藥落輕伴柳花飄
神女羞捐佩鮫人敢獻綃
東皇應好事避舍亦相饒

次彭應之餐雪韻

雪水淪清茗自謂絕世清
終然犯煙火况復勞煎烹
豈如

一
珍做宋版印
午霽餘探此竹外楹柘漿發甘和寶盃凝寒晶心曾既清
涼齒頰亦鏘鳴吞腥期永謝飲玉希長生

次彭應之魚樂亭韻

亭前活水破輕冰漸見遊儵傍石稜老子自知魚樂處不
須莊惠與同登

與劉德明祝濟之胡子寬晚步偶成

雨罷寒逾勁霜威正凜然不知荒逕濕行到野橋邊曠望
情何極徘徊意莫傳清波涵衆影日落暗晴川

劉德明彥集祝弟以夏雲多奇峯爲韻賦詩戲成

五絕

出山幾何時歸來便長夏端居心不怡散策長林下
爲客厭城市還家辭世紛朝昏何所見但有四山雲
閉門事幽討歲月忽已多客來無可問與君共絃歌

干時本已懶曾次况亡奇若問中林趣婆娑祇自知
炎蒸不可柰雲氣滿前峯向夕風吹盡微聞遠寺鍾

仙洲新亭熹名以畫寒紫微張公爲書其額判院
劉丈乃出新句輒次高韻二首

聞說藤蘿外神龍舊所蟠擘開千丈峽寫盡一襟寒賞寄
三杯酒歸投六尺竿若無詩律好清絕不成歡

悄蒨非人境寒蟬夏已稠陽崖驚素雪午扇怯清秋共說
新亭好真堪妙墨留賞心元不厭仙夢肯來遊

時已聞安國之計

次韻畫寒

行穿危磴盡林表見孤亭澗瀉千尋白峯回四面青塵襟
元落落風腋自泠泠一醉今何許無心賦獨醒

次判院丈畫寒亭韻有懷平父

把酒懷人處幽尋記往時新亭勞指顧勝踐闕追隨爲報

層欄出莫憂浮枉欹惟應舊飛雪想象合心知

次判院丈清湍之什

明滅青羅帶周遭碧玉環孤亭感陳迹茂樹喜重攀爽氣
琴尊外泉聲枕簟間詩成無寫處絕壁蘚痕斑

遊密菴分韻賦詩得還字

我行得佳友勝日尋名山春山旣妍秀清溪亦潺湲行行
造禪扉小憇腰脚頑窮探意未已理策重躋攀入谷翳蒙
密俯澗隨泓灣誰將百尺綃掛此長林間雄聲殷地厚洪
源瀉天慳偉哉奇特觀償此一日閑所恨境過清悄悄暮
當還顧步三嘆息人生何苦艱

遊密菴分韻賦詩得絕字

閩鄉饒奇山仙洲故稱傑巍然一峯高復與衆山絕傳聞
極目處天水遠明滅萬里倏往還三光下羅列我來發孤

興徑欲躋巒嶮病骨竟支離何當攀去轍

次韻宿密菴

忽作經宵別曾奇莫與陳暮歸誇得句寒苦頓生春道義
知無斃文章自有真它年應共說此日自由身

遊密菴

弱齡慕丘壑茲山屢遊盤朝隴青冥外暮陟浮雲端晴嵐
染襟裾水石清肺肝俯仰未云已歲月如飛翰中年塵霧
牽引脰空長歎曠歲一登歷心期殊未闌矧此親友集笑
談有餘歡結架迫彎碣徙倚臨奔湍共惜前古秘今爲後
來觀落景麗雲木回風馥秋蘭林昏景益佳悵然撫歸鞍
諒哉故山好莫遣茲盟寒

游畫寒以茂林脩竹清流激湍分韻賦詩得竹字
仙洲幾千仞下有雲一谷道人何年來借地結茅屋想應

厭塵網寄此媚幽獨架亭俯清湍開徑玩飛瀑交游得名
勝還往有篇牘杖履或鼎來共此巖下宿夜燈照奇語曉
策散游目茗椀共甘寒蘭臯薦清馥至今壁間字來者必
三讀再拜仰高山懔然心神肅我生雖已後久此寄齋粥
孤興屢呻吟羣遊幾追逐十年落塵土尙幸不遠復新涼
有佳期幾日戒征軸宵興出門去急雨遍原陸入谷尙輕
埃解裝已銀竹虛空一瞻望遠思翻蹙怱祖跣亟躋攀冠
巾如膏沐雲泉增舊觀怒響震寒木深尋得新賞一簣今
再覆同來况才彥行酒屢更僕從容出妙句珠貝爛盈匊
後生更亶亶俊語非碌碌吾纓不復洗已失塵萬斛所恨
老無奇千毫真浪禿

聞季通德明諸友入山以詩迎之仍請先往觀瀑

布

勝友南窓底看書老歲華不因寒瀑響肯到野僧家古徑
開能久新亭去豈賒躋攀那可緩寂寞有雄夸

次觀瀑布韻

快瀉蒼崖一道泉白龍飛下鬱藍天空山有此真奇觀倚
杖來看思凜然

和季通晝寒韻

萬壑爭流處千年樹石幽危亭因我作勝日爲君留酒笑
紅裙醉詩慙雜珮酬尙嫌心境窄更約九垓游

次韻謁忠顯劉公墓下

理亂由來今古同覆車那肯戒前蹤紛紛誤國人無數不
昧丹心獨此公

次季通晝寒亭韻二首

不信高懷與世殊清游試問與誰俱相將靜聽潺湲水洗

滌塵襟肯自污

山行前後有光輝撲撲浮嵐翠染衣直到仙洲奇絕處晝
寒亭下玉龍飛

飲清湍亭石上小醉再登晝寒

水邊今日共傳杯多謝殷勤數子來三伏炎蒸那有此百
年懷抱頓能開雲山合匝還生霧雪澗崩騰怒吼雷却恨
蒼屏遮遠日凌風直欲跨蓬萊

次清湍亭韻二首

上下青山今白頭穿雲入塢未能休因君去覓仙洲路却
嘆周南獨滯留

仄徑穿林欲造天未妨停策聽涓涓知君便有刀頭意莫
忘仙洲澗底泉

立春大雪邀劉圭甫諸兄遊天湖

同雲被四野寒氣慘悲涼回風一以定密雪來飄揚時當
冬候窮開歲五日彊蓬巷無與適陟此瓊臺岡賓友旣追
隨兒童亦攜將攀躋得冢頂徙倚聊彷徨俯視千里空仰
看萬鶴翔遠迷亂峯翠近失平林蒼偃薄瑩神骨咀嚙清
肝腸朗詠招隱作悲吟黃竹章古人不可見來者誰能量
且復記茲日他年亦難忘

次圭父游將軍巖韻二首

極目危岑杳靄間誰將層棟壓巒岿瘦筇上上莫辭遠絕
境行行得細觀智井尙餘茅經處考槃無復碩人寬倦來
拂石支拳睡萬壑吟風午夢闌

陳迹真成俯仰間回頭猶認碧巒岿更煩地主殷勤意得
盡雲山表裏觀景晏共愁歸路遠年侵獨負酒盃寬明朝
覓句酬珠玉剩喜詩情却未闌

圭父約為金斗之遊次韻獻疑聊發一笑

幾日春風未破寒遠峯晴露玉巒
不成蠟屐攜筇去且復鉤窓拄頰
觀聞道追遊當作意故應期日尚
能寬陰崖凍合無垂練却恐詩翁興
易闌

次彥集經營別墅之作

回北成南指顧間要令華敞對巒
岫家山信有千巖擁

堂見武夷諸峯

雲月何妨兩處觀傑閣已資隣
築勝熹近蒙知府撥賜舊第樓

居新基還見繚牆寬老仙鶴骨殊
蕭爽歸興從今豈易闌

彥集圭父擇之同飲白雲精舍以
醉酒飽德為韻

熹分得飽字醉中走筆奉呈

奔趨名利場禍福急相絞夜窓一
反側膚垢紛兩爪豈知親朋集晚
食聊一飽心期共悠悠文字各稍
稍華燭既屢更詩腸亦頻攪寒更
儘渠深孤諷寧至卯

次劉圭甫和人梅花韻

意行欲遍江村路，恰似詩人斷魂處。梅花未肯笑春風，蔓草何須怨零露。歸來四壁無餘聲，俯檻祇有寒塘青。美人邂逅一笑粲，倒影的皪疎枝橫。寸心久矣遺紛雜，不但老禪齋夏臘。此時悵悵欲何言，本根落落幾難合。走遍諸君詩卷中，西湖東閣病還同。劃然長笑驚夢破，碧雲散盡山叢叢。

平父有攀條嚼藥繞千回日暮碧雲驚四合之句故云

奉酬圭父末利之作

玉蘂琅玕樹，天香知見薰。露寒清透骨，風定遠含芬。爽致銷繁暑，高情謝曉雲。遙憐河朔飲，那得醉時聞。

奉酬圭父白蓮之作

忽傳夔府句，并送遠公蓮。翠蓋臨風迥，冰華浥露鮮。舞衣清縞袂，倒影景爛珠。躔想象芙蓉闕，冥冥絕世緣。

次圭父觀魚韻

平生三伏斷追遊誰喚來穿澗樹幽初訝網橫天影破忽
驚人蹴浪花浮鳴榔不用齊吳榜鼓柁何須學楚謳便有
金盤堆白雪却憐清泚向東流

奉同黃子厚賦白芙蓉呈劉彥集平父

湛湛曲池水曉含風露清田田綠羅蓋粲粲白玉英澹然
絕世姿不與穠艷并俯鑒冰雪影詎懷兒女情山中徒淹
留堂下空目成獨有忘機客相看兩無營

觀洪遵雙陸譜有感呈劉平甫范仲宣二兄

近從新譜識梟盧擬喚安陽舊博徒只恐分陰閑過了更
教人誚牧猪奴陶桓公嘗語人曰大禹聖者乃惜寸陰至
於時死無聞於後是自棄也諸參佐或以談戲廢事者乃
命取其酒器蒲傳之具悉投之江吏將則加鞭朴曰樗蒲
者牧猪奴戲耳君子當正其衣冠攝
其威儀何有蓬頭跣足自謂宏達耶

次劉彥集木犀韻三首

衆芳搖落九秋期
橫出天香第一枝
莫似寒梅太孤絕
更交遙夜笛中吹

仙衣纔試鬱金黃
便覺秋風滿院芳
定觀極知先透徹
通心豈是故迎將

秋到寒巖桂樹叢
小山吟罷思悲翁
不妨更作淹留計
占取人間十里風

寄謝劉彥集菖蒲之貺二首

君家蘭杜久萋萋
近養菖蒲綠未齊
乞與幽人伴岑寂
小窓風露日低迷

泉清石瘦碧纖長
秋露懸珠炯夜光
箇裏無窮閑造化
別來誰與共平章

公濟惠山蔬四種并以佳篇來貺因次其韻

蕓

靈草生何許風泉古澗傍
寒裳勤采擷枝筴噀芳香
冷入玄根閱春歸翠穎長
遙知拈起處全體露其常

芹

晚食寧論肉知君薄世榮
瓊田何日種玉本一時生
白鶴今休誤青泥舊得名
收單還炙背北闕儻關情

時公濟試禮部

筍

新笋因君寄康廬入夢中
丹元餘故宅翠竹尚餘風
日日來威鳳年年饌籜龍
猶嫌有兼味不似一源功

廬山簡寂觀道士陸

脩靜之所居從遠法師蓮社之遊賜號丹元先生觀有甜苦笋今者所惠乃甜笋也

蕨

西山採蕨人蓬首尚傾國
懷哉遠莫致引脰氣已塞
頃筐忽墮前此意豈易得
良遇不可遲枯筍有餘力

題吳公濟風泉亭

澗谷居永久高情未云酬茲焉發天祕始造寒巖幽上有
茂樹陰下有清泉流結亭倚蒼峭鑿磴窮嵌丘翠壁自屏
立青蘚亦環周竭來憇永夏凜若臨清秋仰空韻笙竽俯
檻鏘琳璆幽聽一以會悠然與神謀遐哉超世心暇日聊
娛憂笑問車馬客誰能淹此留

再題吳公濟風泉亭

華林翠磴響風泉竟日閑來石上眠更結危亭俯幽聽未
妨長作地行仙

奉和公濟兄留周賓之句丙申九日

端居感時序駕言誰適從聊攜二三子杖屨此日同悠哉
素心人宴坐空巖中真成三秋別夢想情何窮行行陟崇
岡引脰希高風忽然兩相值俯仰迷西東鱸堂偶休閒雞

黍聊從容不辭腰脚勞共上西南峯佩萸笑長房把菊追
陶公遐觀衆山迴一酌千慮融興罷復來歸杳靄秋堂空
窺樽訖餘瀝倚閣聞疎鍾主人意未闌驪駒勿怱怱

寄吳公濟兼簡李伯諫五首

客子歸來春未深祗應寒雨罷登臨閑窓竟日焚香坐一
段孤明見此心

三徑莓苔晝掩關君來問道却空還從今蠟屐應無恙有
興何妨再入山

盤翁別去久無書可復因循自作疎珍重寄聲煩問訊箇
中消息定何如

繁絃急筦盛流傳清廟遺音久絕絃欲識寥寥千古意莫

將新語勘塵編

謂鹽官中庸

憶昔殊方久滯淫年深歸路始駸駸傍人欲問箏瓢樂理

義誰知悅我心

公濟和詩見閔耽書勉以教外之樂以詩請問二

首

至理無言絕淺深塵塵剝剝不相侵如云教外傳真的却是瞿曇有兩心

未必瞿曇有兩心莫將此意攪儒林欲知陋巷憂時樂只向韋編絕處尋

伯諫和詩云邪色哇聲方漫漫是中正氣愈駸駸予謂此乃聖人從心之妙三歎成詩重以問彼二首

任從耳畔妍聲過特地曾中順氣萌箇裏詎容思勉得羨君一躍了平生

闕里當年語從心至今蹤跡尙難尋况君直至無心處肯

向人前話淺深

游百丈山以徙倚弄雲泉分韻賦詩得雲字

執熱倦煩跼駕言起宵分隨川踏曉月度嶺披朝雲攀緣
白石梯拂拭蒼蘚紋噴薄驚快覲琮琤喜先聞奇哉此精
廬眇然隔塵氛諸公肯同來定非俗子羣永日坐清樾短
章策奇勳慨然念疇昔聯裾已荒墳中路忘磬折寸心謾
絲棼惟應泉石願三生有餘薰茲游獲重尋十載心氤氳
他年訪舊躅山靈莫移文

百丈山六詠

石磴

層崖俯深幽微逕忽中斷努力一躋攀前行有奇觀

小澗

兩崖交翠陰一水自清瀉俯仰契幽情神襟頓飄洒

山門

置屋兩山間，巧當奇絕處。峽束百泉傾，澗激回風度。

石臺

出谷轉石稜，俯身窺木末。夕眺嵐翠分，朝躋雲海闊。

西閣

借此雲窓眠，靜夜心獨苦。安得枕下泉，去作人間雨。

瀑布

巔崖出飛泉，百尺散風雨。空質麗晴暉，龍鸞共掀舞。

游蘆峯分韻得盡字

蘆山一何高，上上不可盡。我行獨忘疲，泉石有招引。須臾出蒙密，矯首眺無畛。已謂極崢嶸，仰視猶隱嶙。新齋小休憩，餘力更勉黽。東峯切霄漢，首夏正淒緊。杖策同攀躋，極目散幽窘。萬里俯連環，千重瞰孤隼。因知平生懷，未與塵

慮泯歸塗采薇蕨晚餉雜蔬筍笑謂同來人此願天所允
獨往會淹留寒棲甘菌蠹山阿子慕予無憂勒回軫

同丘子服游蘆峯以嶺上多白雲分韻賦詩得白

字

登巖出囂塵入谷媚泉石悠然愜幽趣不覺幾朝夕高尋
倦冢頂舊賞歎陳迹仰慙仙人杖俯愧謝公屐昨日吾弟
來勇往意無斃今晨蓐食罷千仞一咫尺心期未究竟眼
界已開闢浮野衆麓青縈雲兩川白須臾互吞吐變化已
今昔曠若塵慮空悲哉人境窄平生有孤念萬里思矯翮
感此復冲然胡爲尙形役

登蘆峯

行到蘆峯最上頭幾回振策又還休因君好句撩孤興却
恨雲烟未肯收

將游雲谷約同行者

躋險擇幽棲，竦蘿結茅屋。疏泉下石澗，種樹滿煙谷。時登北原上，一騁千里目。雲物下逶迤，岡巒遠重複。暫辭忽曠歲，再往恨牽俗。因悲昨游侶，或已在鬼錄。前年元暄風悟履同游新陽一雨欣，衆綠明發君。莫遲幽期我，當卜

白雲九月六日早發潭溪夜登雲谷翌旦賦此

懷山不能寐，中宵命行軒。亭午息畏景，薄暮登危巒。峻極踰百磴，縈紆欲千盤。行行遂曛黑，月落天風寒。羽人候中塗，良朋集林端。問我何所迫，而嘗茲險艱。疲勞旣云極，飢渴不能言。投裝臥中丘，幸此一室寬。怒號竟永夕，客枕無時安。旦起闢幽戶，竹樹青檀欒。驚喜非昔覩，披尋得新觀。淹留十日期，俯仰有餘歡。寄語後來子，勿辭行路難。

雲谷二十六詠

雲谷

寒雲無四時散漫此山谷幸乏霖雨姿何妨媚幽獨

南澗

危石下崢嶸高林上蒼翠中有橫飛泉崩奔雜奇麗

瀑布

峯回危逕轉垂練忽千尋不爲登山倦躊躇秋澗陰

雲關

白雲去復還黃塵到難入只有澗水聲出關流更急

蓮沼

亭亭玉芙蓉迴立映澄碧只愁山月明照作寒露滴

杉逕

南起雲關口縈紆上草堂天風發清籟山月度寒光

雲莊

小丘橫翠几層嶂復嵯峨釋耒閑來看巖姿此處多

泉硤

入關但平田復此得清響何必問真源神襟一蕭爽

石池

兩岸蒼峭石護此碧泓寒秋月來窺影驪珠吐玉盤

山楹

山楹一悵望恨此雲迷谷仙人不可期縹緲雙髻綠

藥圃

長鑱斲靈根時此泉下圃珍劑未須論丹萸已堪煮

井泉

山高澤氣通石竇飛靈液默料谷中雲多應從此出

西寮

畚田種胡麻結草寄林樾珍重無心人寒棲弄明月

晦菴

憶昔屏山翁示我一言教自信久未能巖棲冀微效

草廬

青山繞蓬廬白雲障幽戶卒歲聊自娛時人莫留顧

懷仙

西望多奇峯北瞰獨仙府欲致武夷君石壇羅桂醕

揮手

山臺一揮手從此斷將迎不見塵中事惟聞打麥聲

雲社

自作山中人卽與雲爲友一嘯雨紛紛無勞三奠酒

桃蹊

澗裏春泉響種桃泉上頭爛紅紛委地未肯出山流

竹塢

悄蒨桃蹊北蕭穆竹塢深不堪秋夜永風雨助悲吟

漆園

舊聞南華仙作吏漆園裏應悟見割憂嗒然空隱几

茶坂

携籥北嶺西采擷供茗飲一啜夜窓寒跣趺謝衾枕

絕頂

當年赫曦臺移治在茲嶺寥廓無四隣三光疑倒影

北澗

土斷川亦分北下成陰澗秀石得佳名服膺吾敢慢

澗有仁義石

中溪

南下東嶺阿云是中溪道巖樹愛樛枝石田悲蔓草

休菴

別嶺有精廬林巒亦幽絕無事一往來茶瓜不須設

雲谷雜詩十二首

登山

夕陽翳東峯微月下西嶺不辭青鞋穿陟此巖路永巖路
永且躋中情何耿耿

值風

山下風吹衣山上風拔木茅茨何足保瀛海慮翻覆未念
執鬯人無心還自恧

見易傳
震卦

翫月

風起雲氣昏風定天宇肅遙遙萬里暉炯炯穿我屋良友
共徘徊山中詎幽獨

謝客

野人載酒來農談日西夕此意良已勤感歎情何極歸去

莫頻來林深山路黑

勞農

四體久不勤筋力坐驚緩何事兩山阿
離離豆苗滿多謝
植杖翁居然見長短

講道

高居遠塵雜崇論探杳冥疊疊玄運駛
林林羣動爭天道
固如此吾生安得寧

懷人

吾黨二三子欲來從我遊塵機諒擾擾
遐諾終悠悠空山
日復晚佇立悵夷猶子厚伯崇有約不至

倦遊

故人千里別約我仍丹丘云何一解散
書到令人愁此山
豈不幽何必賦遠遊時得伯恭書報罷天台之遊

修書

紬書厭塵累執簡投雲關靈鑰啓玄秘肅斧鋤幽姦書成
莫示人留置此山間

宴坐

登山思無窮臨水心未厭沉痾何當平膏肓今自砭默坐
秋堂空遐觀靡餘念

下山

行隨流水聲步出哀壑底綠樹枝相樛白澗石齒齒樹石
無窮年流水日千里

還家

出去柴門掩歸來蕙草秋素萼林下吐清芬衣上淨欲寄
山中友日暮悵離憂

雲谷合記事目效俳體戲作三詩寄季通

雲關須早築基趾要堅牢栽竹行教密穿池岸欲高乘春
移菡萏帶雪覓蕭慘謂杉徑也更向關門外疏泉斬亂蒿

堂成今六載上雨復旁風逐急添茆蓋連忙畢土功謂柱

塲塲桂林何日秀蘭逕幾時通并築雙臺子東山接水筒

莊舍宜先立山楹却漸營泉疏藥圃潤堰起石池清早印
荒田契仍標別戶名想應頻檢校祇恐欠方兄

雲谷懷魏元履

歎息良齋老當年共此來千峯奇絕處一望興悠哉病怯
披雲臥詩勞擁鼻裁祇今何處所宿草閱餘哀

送許順之南歸二首

門前三逕長蒿萊愧子殷勤千里來校罷遺書却歸去此
心元自不曾灰

幾年江海事幽尋偏與雲僧話此心今日肯來論舊學歲

寒猶恐雪霜侵

宿雲際寺許順之將別以詩求教次韻

薄暮投花縣聯車入翠微長林生缺月永夜照寒扉情話
欣無斲離懷悵有違勉哉彊毅力千里要同歸

挽江端明三首

聖主興炎運明公起妙年材推漢庭右學自北方傳出入
丹心壯安危素髮鮮空餘題劍在光燭舊林泉

曠宇元無際孤標自不羣物情良有寄讒口詎堪聞未許
時明政猶堪史闕文衣冠忽長夜餘子謾紛紛
先友當年感斯文元祐徒艱虞共流落存沒半嗚呼顧我
真無賴逢公幸不孤祗今還一慟卽此是窮塗

彥集奉檄歸省示及佳篇次韻奉酬呈諸兄友

游子思親久聚糧不堪官裏簿書忙平生况少鷹鷂意此

日尤慙時世粧臘雪未消歡奉檄春風初轉喜還鄉上堂
佳慶從容問一嚼何妨累十觴

彥集兄再適臨汀惠顧蓬華賦詩留別眷予良勤
次韻祖行言不盡意

賸喜君才老更成伊優叢裏見孤撐官身未免心徒壯親
膝頻違淚欲橫簿領不嫌春筍束廉聲要比玉壺清枉車
投翰殷勤甚安得仁言與贈行

圭父爲彥集置酒白蓮沼上彥集有詩因次其韻
呈坐上諸友

大阮歸來客滿堂更移芳席近回塘共憐的皪水花淨并
倚離披風蓋涼銀筆看題青玉案佳人悵望碧雲鄉此時
此景真愁絕病著無因爲舉觴

寄題宜春使君定叟張兄隱齋

此詩恐當
合作一首

大專槃萬生異體實同氣云胡分彼己直以私自蔽
君家桂林伯德學妙一世閉戶不忘憂纓冠矧行義
眷言介弟賢四益謹先畀千里各分符一心同盡瘁
遠題齋戶冊來表棲息地系述寫心曾俯仰資惕厲
陽嘉旣滌蕩陰慝失封閉介然彼苛癢赫若我黥劓
拊摩極哀恫征取敢常藝戰兢一日力洋溢四封被
君看物我間隱顯豈殊致願反振民功更懋根本計

次韻題平父兄重建一枝堂

畫戟朱門枕碧山貂蟬元自出儒冠更餘此日林間樂遠
繼當年膝下歡命駕賓朋千里近放懷琴酒百憂寬遺編
却好傳孫子莫遣因循學宴安

日用自警示平父

圓融無際大無餘卽此身心是太虛不向用時勤猛省却

於何處味真腴尋常應對尤須謹造次施爲更莫疎一日
洞然無別體方知不枉費功夫

抄二南寄平父因題此詩

闕里言詩得賜商

子貢

千秋誰復與相望鄒汾

孟子文斷

簡光前載關洛

張子

新書襲舊芳析句分章功自少吟風

弄月興何長從容咏嘆無今古此樂從茲樂未央

題劉平甫定菴五詠

定菴

風生長林悲雲起空谷暝下有不死人一室常在定

巢雲

入山何所見雲樹春濛濛安知巢居子避世於其中

山臺

林居厭棲迷山頂幸清曠無事一登臨却愁心浩蕩

井泉

開山昔何人鑿此寒泉井獨夜漱瓊瑤泠然發深省

壽穴

百年不可期一壑當預卜自憐木偶人空羨王官谷

劉平甫席上分韻得寫字

歲暮風雨交流雲暗平野公子燕華姻招呼及同社

高情寄壺觴晤語到風雅剪燭夜堂深幽懷共輸寫此詩恐當

一作一首

劉平甫分惠水榭小詩為謝二首

年來衰懶罷書淫偶向盆山寄此心何事涼陰老居士便

分幽賞助清吟

何處飛來簷蔔林老枝樛屈更蕭慘淒涼杜老江頭句坐

對行吟得自箴少陵江頭五詠於榭子詩云於身色有用與道氣傷和

和喜雨二絕

兩師誰遣送餘春珍重天公惠我民且看歡顏垂白叟莫
愁頰頰踏青人

黃昏一雨到天明夢裏豐年有頌聲起望平疇烟草綠只
今投筆事農耕

和章國華祈雨呈平父諸兄三首

極目平疇半欲枯遙知精禱意無餘更憐不待豚蹄祝便
得汗邪暗滿車

九重清夜仰昭回旱魃知從何處來不是幽人祈得雨又
煩丹詔走風雷

晴窓揮汗苦驕陽雨檻披衣快晚涼多謝龍公餘事業爲
驅寒谷變炎方

山館諸兄共賦驟雨鷺鷥二絕

平疇焦渴不堪論
簫鼓悲秋徹
帝閣霹靂一聲雲
自墨山前山後雨翻盆

雨罷微塘凜欲秋
飛來白鳥便夷猶
從今認得橫塘路
水遠天長百不憂

唐石雪中

春風欲動客辭家
霖潦縱橫路轉賒
行到溪山愁絕處
千林一夜玉成花

秋日同廖子晦劉淳叟方伯休劉彥集登天湖下
飲泉石軒以山水含清暉分韻賦詩得清字

閒居寡儔侶
掩關抱孤清
良友倏來止
曠然舒我情
矧此涼秋初
暑退裳衣輕
相與一攜手
東山眇遐征
前穿林嶺幽
俯瞰川原平
降集崖寺古
徘徊濁醪傾
長吟伐木篇
潛鱗亦相驚
願結沮溺耦
窮年此巖耕

淳熙戊戌七月二十九日與子晦純叟伯休同發
屏山西登雲谷越夕乃至而季通德功亦自山北
來會賦詩記事以雲臥衣裳冷分韻賦詩得冷字
端英得幽貞考槃寄茲嶺未成長往計抱恨中耿耿秋風
吹庭樹遙夜枕席冷感彼歲序移慨此心事永明晨發孤
興趣駕向絕境躋攀力雖倦想象意逾騁雲山一以眺俯
仰疑倒景檢校石田收眷戀茅屋靜淹留復未遂外物愧
張邴珍重同來人妙語各清整擊節三嘆餘超然得深省
宿黃沙以山如翠浪湧分韻賦詩得如字
日中秣吾馬日暮膏吾車崎區涉南嶺浩蕩凌八嶇夜雨
薦峯前朝登碧琳瑯蒼茫永歎罷翕忽清景徂去此二三
子我行將焉如崔嵬正丘垤萬里思南圖

雲谷次吳公濟韻

昔營此幽棲邈與世相絕誓將百年身來守固窮節心期
苦未遂歲月一何闊終然匹夫志肯遽甘沒沒茲晨復登
瞰目盡雲一抹激烈永嘯餘朗寥高韻發夫君內德備不
學王貽兀觀心見參倚出世自英傑竭來肯顧我同去弄
雲月微言得深扣大句亦孤拔多謝警疎慵未敢嘆瞻忽
更問毫釐間是同端是別

宿休菴用德功壁間韻贈陳道人

暮入千峯裏寒棲一草菴室連丹竈煖廚引石泉甘塵慮
紛難到神光暖內含非君有道氣孤絕詎能堪

挽劉樞密三首

天畀經綸業家傳忠義心謀謨經國遠勳烈到人深廊廟
風雲斷江湖歲月侵一朝成殄瘁九牧共沾襟

談笑平蠻策焦勞振廩功復讐乖宿志忍死罄餘忠人嘆

百身贖天悲一鑑空九原終莫起千載自英風
久矣身無用前恩嘆莫償豈期今老大復此重悲傷淚向
遺書盡心隨宿草荒諸君那不死慟絕鬢成霜

武夷七詠

天柱峯

屹然天一柱雄鎮幹維東祇說乾坤大誰知立極功

洞天

絕壁上千尋隱約巖栖處笙鶴去不還人間自今古

畫鶴

誰寫青田質高超鴈鶩羣長疑風月夜清唳九霄聞

仰高堂

面勢來空翠哦詩獨好仁懷人今已矣誰遣棟梁新此堂與迎

綠亭皆劉建康所名禮記引高山仰止
景行行止之詩而曰詩之好仁如此

趨真亭

危亭久已傾，祇有頽基在。何事往來人，不知容鬢改。

大小藏巖

藏室岌相望，塵編何莽鹵。欲問伯陽翁，風煙迷處所。

丹竈

仙人推卦節，煉火守金丹。一上煙霄路，千年亦不還。

壬子三月二十七日聞迅雷有感

誰將神斧破頑陰，地裂山開鬼失林。我願君王法天造，早施雄斷答羣心。

晦庵先生朱文公文集卷第六

考異

和人游西巖 澗寺澗一作樹

題周氏溪園三首一首無後

次韻梧竹 檀欒團一作欒 慘淡慘一作澹

次開善避暑韻 花思滿曾存滿一作存 氣

送林熙之 妙緼妙一作蓄 只自合一作自 若知體用元無

間一作若明體 用真無間

晚步偶成 雨罷寒逾勁寒一作雨 歇 暗晴川澄一作倍

和晝寒韻 爭流爭一作陳 樹石謝一作石

謁劉公墓 誤國迷一作國 此公我一作公

次彥集別墅 信有倍一作有

次和人梅花韻 本根本一作願

葳 芳香芬一作香 翠穎秀一作穎

芹 收單 收一作功

筍 籜龍 伏龍一作龍

寄吳公濟 客子 投一作絨

祗應 祗一作因

罷登 倦一作登

從今 只一作今

寄聲 寄一作音

年深 年一作來

欲問 若一作問

游百丈山 隨川 隨一作風

石臺 出谷 山一作谷

同丘子服游蘆峯 兩川 滿一作川

杉逕 南起 晨一作起

桃蹊 裏春 東一作春

絕頂 移治在茲嶺 名一作移來

休菴 林巒 林一作澗

值風 山上 山一作中

謝客 酒來 酒一作至 頻來 頻一作來

修書 雲關一作靈關

定菴山臺 林居一作林中

雲谷次吳公濟韻 觀心見參倚一作秉心 極清淨

世自一作世有

更問一作且問

福州府學訓導舒鑿校

蘇軾抄學傳集卷之

夏間一
蘇軾文與公衡贈
蘇少長參尚書

蘇軾山臺
林思

蘇軾
蘇軾

晦庵先生朱公文集卷第七

詩

崇壽客舍夜聞子規得三絕句寫呈平父兄煩爲
轉寄彥集兄及兩縣間諸親友

空山初夜子規鳴靜對琴書百慮清喚得形神兩超越不
知底是斷腸聲

空山中夜子規啼病怯餘寒覓故衣不爲明時堪眷戀久
知岐路不如歸

空山後夜子規號斗轉星移月尙高夢裏不知歸未得已
驅黃犢度寒臯

寄雲谷瑞泉菴主

憶昔誅茅日山房我自名風埃猶俗累煙雨負巖耕多謝
空門侶能同物外情肯來分半壑聊爾度平生少待清秋

日閑尋遠嶽盟不知誰是客一笑絕塵纓

入南康界閱圖經感陶公李渤劉疑之事戲作

長官定笑歸來晚中允應嫌去却回惟有山人莫相笑也
曾還俗做官來

屢游廬阜欲賦一篇而不能就六月中休董役臥
龍偶成此詩

登車閩嶺徼息駕康山陽康山高不極連峯鬱蒼蒼金輪
西嵯峨五老東昂藏想象仙聖集似聞笙鶴翔林谷下淒
迷雲關杳相望千巖雖競秀二勝終莫量仰瞻銀河翻俯
看交龍驤長吟謫仙句和以玉局章疇昔勞夢思茲今幸
徜徉尙恨忝符竹未愜棲雲房已尋兩峯間結屋依陽岡
上有飛瀑駛下有清流長循名協心期弔古增悲涼壯齒
乏奇節頽年矧昏荒誓將塵土蹤暫寄雲水鄉封章儻從

欲歸哉澡滄浪

讀李賓老玉澗詩偶成

獨抱瑤琴過玉溪
琅然清夜月明時
祇今已是無心久
却怕山前荷簣知

立秋日同子澄寺簿及僉判教授二同寮星子令
尹約周君段君同遊三峽過山房登折桂分韻賦
詩得萬字輒成十韻呈諸同遊

抗塵幾何時猿鶴共悲怨
豈知朱墨暇乃適山水願茲晨
秋令初休沐謹邦憲佳賓忽四來
英僚亦三勸駕言北郭門謝此
旗隼建散目山崔嵬縱轡路
脩蔓凭欄快倒峽躋壑困脫輓
追攀林樾深懽喜脚力健登高
眺遠浦衆景爭自獻何必仍丹
丘徑欲凌九萬

和子澄白鹿之句

經旬不到鹿場陰夢想飛馳不自禁幸有高軒同勝賞何妨折屐共幽尋徘徊未厭詩書樂感慨難忘忠孝心更對豐鐫哦伐木風泉雲壑助清吟

暇日侍法曹叔父陪諸名勝爲落星之遊分韻得往字率爾賦呈聊發一笑

長江西委輸匯澤東滉瀟中川屹孤嶼佛屋寄幽賞我來此何日秋氣欲蕭爽共載得高儔良晨豈孤往酒酣清獻發浪湧初月上疊鼓喚歸艎陳迹真俯仰

九日奉陪高州史君莆陽別駕會稽丞公善化明府仲衡詩伯并屈子美元範二兄及郡中諸文武同登紫霄絕頂南望江湖北眺淮甸少快心目旣歸又得仲衡佳篇句法清麗情致悽惋三復不勝起予之歎謹次韻呈請皆賦之以紀一時之盛甚

惠甚望

此日登高處千巖錦樹稠無人嘲落帽有客賦悲秋忽忽塵中老忽忽物外遊江湖空極目不盡古今愁

下元節假行視陂塘因與賓友挈兒甥出郭登山歸賦二詩示子直春卿及折桂雲谷并寫呈郡中諸寮友

廬阜東北際岩嶢五峯尊中巖穹林繞青天白雲屯郡閣有佳眺徙倚空朝昏今晨幸休暇發軔北郭門牽蘿出林端躡屐躋雲根高尋却深宦小憇欣潺湲古殿宿寒靄新薨麗朝暎扶藜陟東岡夙昔規曾軒却倚千尋峭前窺百泉奔長風卷浮埃江湖渺相吞結架雖未諧雄瓌已難論同來俱勝流晤語仍王孫已踐支許諾不慙夙尙魂賦詩紀茲日歲晚期相敦

臥龍之遊得秋字賦詩紀事呈同遊諸名勝聊發一笑

躡石度急澗窮源得靈湫
豁兩對立噴薄中怒投何年
避人世結屋棲巖陬嘉名信有託
故迹誰能求我來一經行
淒其仰前脩鄰翁識此意伐木南山幽
爲我立精舍開軒俯清流多岐諒匪安
一壑真良謀解組云未遂驅車且來遊
嘉賓頗蟬聯野菽更獻酬飲罷不知晚
欲去還淹留躋攀已別峯窺臨忽滄洲
下集西澗底沉吟樹相繆玉淵茗飲餘
三峽空尊愁懷賢旣伊鬱感事增綢繆
前旌向城郭回首千峯秋

臥龍之遊錢通守得江字不及賦詩已解維矣熹用其韻紀事以贈并附卷末

君行安所適衝風泝濤江傳聞閩州好未見心已降邀君

康山遊聽此巨壑淙班坐酌溪石幽尋憇雲窗勸君盡此
杯錦帆已稠杠明年儻來東鳴鏡建高幢訪我深澗底晤
言絕紛隴城南且細說慰我心恹恹

分韻得眠意二字賦醉石簡寂各一篇呈同遊諸
兄

驅車何所適往至秋雲邊企彼澗中石舉觴酌飛泉懷哉
千載人矯首辭世喧淒涼義熙後日醉向此眠仰視但青
冥俯聽驚潺湲起坐三太息涕泗如奔川神馳北闕陰思
屬東海壩丹衷竟莫展素節空復全低徊萬古情惻愴顏
公篇爲君結茅屋歲暮當來還醉石

天秋山氣深日落林景翠亦知後騎迫且復一流憇環瞻
峯列屏迴矚泉下瀾永懷仙陸子久挹浮丘袂于今知幾
載故宇日荒廢空餘醮壇石香火誰復繼更憐韋刺史五

字有真意虎竹付歸人悲風起橫吹沉吟向絕迹浩蕩發
幽寄來者知爲誰念我儻三喟簡寂

尋白鹿洞故址愛其幽邃議復興建感歎有作

清泠寒澗水窈窕青山阿昔賢有幽尚眷言此婆娑事往
今幾時高軒絕來過學館空廢址鳴絃息遺歌我來勸相
餘杖策搴綠蘿謀野欣有獲披圖知匪訛永懷當年盛莘
莘衿佩多博約感明恩涵濡熙泰和淒涼忽荒榛俯仰驚
頽波發教逮綱紀喟然心靡宅伐木循陰岡結屋依陽坡
一朝謝塵濁歸哉碩人藹時已疏上尚
書乞洞主矣

遊白鹿洞熹得謝字賦呈元範伯起之才三兄并

示諸同遊者

歲月有環周窮臘忽受謝眷眷山水心幸此朱墨暇招呼
得良友邂逅成夙駕深尋故轍迹喜見新結架永懷拾遺

公藏器此待價橫流詩書澤下及楊李霸炎神撫興運制
作流大化石室萬卷藏綸言九天下規模未云遠荒蕪良
可詫自非賢邑宰誰復此精舍會當求敕賜畢願老耕稼
更與盡心期臨流抗風榭

元範尊兄示及十梅詩風格清新意寄深遠吟玩
累日欲和不能昨夕自白鹿玉澗歸偶得數語

江梅

大雪天地閉窮陰渺寒濱誰知江南信已作明年春

嶺梅

梅花破萼時瘴雨吹成雪驛使忽相逢無言似愁絕

野梅

野風吹孤芳迥立正愁絕皂蓋莫徘徊堪看不堪折

早梅

霜風殊未高杖策荒園裏仙子別經年相看共驚喜

寒梅

白玉堂前樹風清月影殘無情三弄笛遙夜不勝寒

小梅

且喜梅花開莫嗟梅花小花小風味深此意君已了

疎梅

玉笛未黃昏冰灘已清淺疎影不勝妍愁心為誰遠

枯梅

樛枝臥龍蛇冷蘂綴冰雪千里故人心今年為誰折予家居時

劉平甫折此枝為贈

落梅

花開已淒涼花落更愁寂來歲煙雨時為君和鼎實

賦梅

君欲賦梅花梅花若爲賦繞樹百千回句在無言處

觀梅小集以齋禁不得奉陪因寄小詩

梅花年後欲離披恰是先生變食時送與西樓一尊酒諸君莫負可憐枝

元範別後寄惠佳篇清叟次韻見示格律俱高詠歎不置因亦用韻寫呈二兄聊發一笑

故人別我去一月曠音驛今朝得新詩開卷意已適知君到里門征騎聊一息行復敞天閣從容正朝幘自今九霄路不復兩塵隔容與日華東翺翔禁扉北回頭五峯下寂寞笑孤客不賦歸去來心形謾相役

右呈元範

五十行過二雙鬢颯秋草平生素心人誰與共茲抱今年廬山下得子恨不早歲月幸同庚詩書復同道惟應山南北雲母夜堪擣獨生有先期迴崖詎難到丹經不我誑白

髮須一掃看公鬚眉蒼杖鉞督征討右呈清叟

次卜掌書落成白鹿佳句

重營舊館喜初成要共羣賢聽鹿鳴三爵何妨奠蘋藻一編詎敢議明誠深源定自閑中得妙用元從樂處生莫問無窮菴外事此心聊與此山盟

白鹿講會次卜丈韻

宮墻蕪沒幾經年祇有寒煙鎖澗泉結屋幸容追舊觀題名未許續遺編請為洞主不報青雲白石聊同趣謂西澗劉公霽月光風更別傳謂濂溪夫子珍重箇中無限樂諸郎莫苦羨騰騫

再用前韻示諸同遊

幽臥寒巖不記年飽看山月聽風泉舒憂正得琴三疊玩意惟憑易一編誤落塵中乖夙尚却思洞裏付真傳封章倘幸天從欲便解銅符謝繫騫

次韻四十叔父白鹿之作

誅茅結屋想前賢千載遺蹤尙宛然故作軒窗挹蒼翠要
將絃誦答潺湲諸郎有志須精學老子無能但欲眠多少
箇中名教樂莫談空諦莫求仙

送四十叔父

吾家從昔號清門叔父于今道更尊客路艱難空自惜遺
經終始向誰論獨尋雲嶠逢孤姪共愛春江接故園細說
刈葵休放手此來真不爲盤餐

伏蒙祕閣張丈寵顧下邑并以長篇爲貺降歎之
餘牽勉繼韻仰求斤削僭率皇恐

向來滅迹東山東閉門不問烏雌雄門前有路向塵土兩
足未舉心先慵當時亦有車馬客此意欲說嗟誰同窮居
聊復追仲蔚篤論何必須劉龔平生故人子張子相思安

得長相從每勞書疏問生死坐想星宿羅心胸幾年持節
漢水上木牛流馬旌旗紅君王輟饋思頗牧外庸且訖來
朝宗因能過我紫霄下後乘載得珠簾櫳蒼顏白髮應笑
我曷不飽臥陶窗風開樽鵝池水清澈下馬醮石烟空濛
須與路轉山更好摩天巨刃排雙峯少看銀河忽倒掛直
欲跳下清泠中南臨匯澤共指點縹緲貝闕浮珠宮公言
平日愛登覽到此一洗羣山空坐間爲我出奇句不用遠
寄南飛鴻上言雲泉足奇賞下歎契闊歡相逢紛吾失脚
墮世網乃有此會寧天窮流光過眼驚昨夢舊約回首羞
塵容明朝却上煙艇去滅沒萬頃追鳧翁

和張彥輔初到南康之句

十年不共賦陽春正有胸中萬斛塵失喜清詩還入手細
看佳句轉驚人知公近覺青山好顧我頻嗟白髮新肯過

寒齋共尊酒向來心事請深陳

奉同都運直閣張丈哭敬夫張兄張丈有詩敢次

元韻悲悼之極情見乎詞伏幸采覽二首

秀翁威略憺華戎遺恨車書久未同喜有象賢堪嗣事故
知鴻業自無窮蕃宣合奏三年最風采俄驚一旦空根本
平生有深計遺書不但子囊忠

不應世道即漂淪何事今年失此人禮樂端能懷益友琴

笙忍遽樂嘉賓亦知遊好曾通譜却記登臨喚卜隣兩首

悲詩數行淚感傷那復鬪清新張丈垂顧適聞訃音為罷郡宴敬夫向嘗約熹徙居

湖之上蓋相語於裴公臺上云

秘閣張丈簡寂之篇韻高難繼別賦五字以謝來

賦

勞農會稽宅息駕丹元鄉丹元不可見翠壁空雲房是時

中春月暄風發新陽白水注幽壑綠樹敷崇岡俯聽足怡
悅仰觀共徜徉班坐得瑤草傾壺出瓊漿長吟遊仙詩亂
以招隱章忽忽林景西躊躇申慨慷坐上江海客兀傲鬚
眉蒼逸氣邁霄漢英詞吐琳琅思與泉石勝韻隨笙鶴翔
追遊不敢及咏歎可能忘

俗傳歸宗是王右軍故宅陸脩靜封丹元真人

和張彥輔落星寺之作

嵌空奇石戰驚濤樓殿崢嶸勢自高四面真成開玉鑑三
山應是失金鰲題詩正爾難搜句舉酒何妨共作豪倚遍
欄干更愁絕歸來白盡鬢邊毛

和張彥輔白鹿洞之作

邃谷新華館風煙再吐吞舊眠聞野鹿遺恨響驚猿

李拾遺

此徒居少室乃被徵故有此句共賞忻同趣分攜愴別魂徘徊空日夕無

策駐行軒

次張彥輔西原之作

無處堪投跡空山寄一椽
懸門窺絕壁繚徑上層巔
檻闕吞江浪窗虛響谷泉
丹經閑自讀不爲學神仙

次張彥輔臥龍之作

瀑水源何處高疑雲漢通
瀉時垂練直落處古潭空
客寄詩能好龍蟠意自雄
知君來峴首爲我說隆中

次張彥輔棲賢之作

融冶何年事停杯莫問天
祇今從痼疾疇昔似因緣
傾耳真三峽投文洑九淵
蘭亭那得此猶足致羣賢

和張彥輔雪後棲賢之作

夜來春雪遍林丘却喜風威曉
便收好上籃輿閑縱目莫
將衲被苦蒙頭微官正愧逍遙社
勝日猶堪汗漫遊欲出
林關戀瑤草不妨尊酒更淹留

謝張彥輔留別之作

一別屢更歲思君無已時知君亦念我相望平兩嗟咨我
 病臥田間君行護疆陲隱顯既殊跡會合安可期今年定
 何年有此一段奇我來五峯陽君歸九江湄聞君肯來辱
 歡喜不自持迎君紫霄峯舉觴白鵝池強健初共欣艱棘
 旋相悲相顧出危涕薄言首東岐留連十日飲愴恨八哀
 詩散懷水石幽遂忘筋力疲雄篇既鼎來逸韻方窮追云
 胡遽告别牙薰風披披攬袂不得留酌酒前致辭願君疇
 此觴去上白玉墀國論罄忠益廟謨參設施一請正紀綱
 再請誅羌夷及時勳樹業慰我空山飢

八哀之句

時聞張荆州計張丈有詩哭之故有

奉答張彥輔戲贈之句

已驅送客車復著登山屐未論窺臨快且脫詩酒厄從今

謹出入保此頤正吉不柰歲寒心於公有深憶

王輔嗣注頤卦大象

云禍從口出病從口入

奉答張彥輔解嘲

康俗遺居萬疊山高垂鐵鑱詎容攀青鞋布韉非公事古木寒泉要我閑

伏蒙某官寵示和陶見寄舊作伏讀歎仰又感知待期許之意蓋非一日率易次韻少見謝臆伏惟矜憐有以教之

吾公抱經濟軒冕非所欣向來清禁闥本自山林人浩歌歸去來神交邈何因一朝脫冠去妙境聊同臻謂予雖後來臭味亦有聞賡詞久見屬重以告語勤荒寒想高風令人思無鄰甘棠矧在此躑躅晴湖濱

贈于盛二生

昔日豐城劍寒光射斗牛江山餘秀傑人物尙風流二妙
今安匹孤帆各倦游還家問師友折節慕前修

秋日告病齋居奉懷黃子厚劉平父及山間諸兄
友

出山今幾時忽忽歲再秋江湖豈不永我興終悠悠况復
逢早魘農畝無餘收赤子亦何辜黃屋勞深憂而我忝朝
寄政荒積憊尤懷痼臥空閣惻愴增綢繆東南望故山上
有玄煙浮平生采芝侶寂寞今焉儔朝游雲峯巔夕宿寒
巖幽爲我泛瑤瑟泠然發清謳裂牋寄晨風問我君何求
洪濤振君柁狹硤摧君輶君還若不早無乃非良謀再拜
謝故人低徊更包羞桂華幸未歇去矣從君游

夜坐有感

秋堂天氣清坐久寒露滴幽獨不自憐茲心竟誰識讀書

久已懶理郡更無術獨有憂世心寒燈共蕭瑟

讀諸友遊山詩卷不容盡和和首尾兩篇

去年尋得李家山考卜真成屋數間要與青衿時散帙閑
臨碧澗共觀瀾詩書本說人間事勳業休看鏡裏顏誰識
寥寥千古意新詩題罷蘚痕斑

向來結友尋名山下窮絕壑高危顛胡爲一旦墮塵網五
老在望心茫然青牛底處有行迹白鹿幾時同正員清遊
帶雨想幽絕妙處只恐詩中傳

戲贈勝私老友

槐花黃盡不關渠老向功名意自疎乞得山田三百畝青

燈徹夜課農書

勝私先侍講嘗著農書三卷

代勝私下一轉語

碓下泉鳴溜決渠屋頭桑樹綠扶疎朱虛正自知田事馬

服何妨讀父書

和戴主簿韻

平生本自好樓居况接高人永晝餘共喜江山入尊俎從
教幕府省文書感君肯出新詩句恨我終思舊草廬擬借
韋編訂龍馬免推納甲話蟾蜍

戴嘗有麻衣易說自以爲得之異人云

次沈侍郎游楞伽李氏山房韻

喜陪後騎陟崔嵬竹裏泉鳴古寺開吟罷蘇仙頭白句天
風更送好詩來

天聰已許一言悟年少懸知萬卷開珍重當時讀書處低
回空有後人來

奉同尤延之提舉廬山雜詠十四篇

白鹿洞書院

在郡城東北十五里事見記文

昔人讀書地町疇白鹿場世道有升降茲焉更表章矧今

中興年治具一以張絃歌獨不嗣山水無輝光荒榛適剪
除聖謨已汪洋亦有皇華使肯來登此堂問俗良懇惻懷
賢增慨慷雅歌有餘韻絕學何能忘

折桂院黃雲觀

在書院東北五里院後作亭取名之
白黃雲萬里動風色之句

城中東北望五老何蒼蒼下有前朝寺一原頗深藏門前
林澗幽屋後雲木荒閑窗亦明潔著此瑞錦張僧房有更
能理枯筇步上林北岡仰視天宇闊俯瞰江流長即黃雲觀受
書彼何人姓字不足詳竹帛有遺臭桂樹徒芬芳李逢吉嘗讀書

此院去而登第以故得名

楞伽院李氏山房

在折桂西十里李公擇讀書處
有東坡記文詩刻枯樹墨跋

躡石循急澗穿林度重岡俛入幽谷邃仰見奇峯蒼李公
英妙年讀書此雲房一去上臺閣致身何慨慷蘇公記藏
書文字有耿光餘事亦騷雅戲墨仍風霜兩公不歸來歲

月忽已荒何用建遺烈寒泉薦孤芳

棲賢院三峽橋

在楞伽西五里

兩岸蒼壁對直下成斗絕一水從中來湧湑知幾折石梁
據其會迎望遠明滅倏至走長蛟捷來翻素雪聲雄萬霹
靂勢倒千巒嶮足掉不自持魂驚詎堪說老仙有妙句千
古擅奇崛尙想化鶴來乘流弄明月

西澗清淨退菴

在棲賢西二里劉凝之舊隱作亭取黃太史詩語名之

凌兢度三峽窈窕復一原絕壁擁蒼翠奔流逝潺湲聞昔
避世人寄此茅三間壯節未云遠高風杳難攀深尋得遺
墟縛屋臨清灣坐晚寒木杪飛泉闕雲關茲游非昔游累
解身復閑保此清淨退當歌不能諼

解卸後與友生遊集徘徊久之

臥龍菴武侯祠

在西澗西三里

空山龍臥處蒼峭神所鑿下有寒潭幽上有明河落我來

愛佳名小築寄幽壑永念千載人丹心豈今昨英姿儼繪
事凜若九原作寒藻薦芳馨飛泉奉明酌公來識此意顧
步慘不樂抱膝一長吟神交付冥漠

萬杉寺

在臥龍西十里

休沐聊命駕駕言何所之行尋慶雲寺想像昭陵時門前
杉徑深屋後杉色奇空山歲年晚鬱鬱凌寒姿當年雨露
恩千載有餘滋匠石不敢睨孤標儼相持寺前後杉萬本皆天聖中植有
旨禁剪更啓石室藏仰瞻天像垂願以清淨化永爲太平
基寺藏仁祖御飛白書有清淨字

開先漱玉亭

在萬杉西二里亭舊在橋上今廢

奇哉康山陽雙劍屹對起上有橫飛雲下有瀑布水崩騰
復璀璨佳麗更雄偉勢從三梁外影落明湖裏平生兩仙
句詠嘆深仰止三年落星灣悵望眼空眯今朝隨杖履得

此弄清泚更誦玉虹篇塵襟諒昭洗

簡寂觀

在開先西五里陸脩靜所居

高士昔遺世築室蒼崖陰朝真石壇峻煉藥古井深結交

五柳翁屢賞無絃琴相攜白蓮渚一笑傾夙心晚歲更市

朝故山鎖雲岑柴車竟不返鸞鶴空遺音

脩靜晚為宋明帝召至建康卒

于崇虛館我來千載餘舊事不可尋四顧但絕壁苦竹寒蕭慘

相傳竹是靜脩手植其萌即所謂甜苦筍者

歸宗寺

在簡寂西十里

金輪紫霄上寶界鸞溪邊往昔王內史願香有餘煙

相傳寺是

王右軍故宅千年今一歸景物還依然澗水既蕩涵山花亦清

妍不辭原隰勞樂此賓從賢訪古共紆鬱勞農獨勤拳憐

我乖勝踐裂牋寄真詮逃禪公勿遽且畢區中緣

是日熹以事不

得陪杖履

陶公醉石歸去來館在歸宗西五里

予生千載後尙友千載前每尋高士傳獨嘆淵明賢及此
逢醉石謂言公所眠况復巖壑古縹緲藏風煙仰看喬木
陰俯聽橫飛泉景物自清絕優游可忘年結廬倚蒼峭舉
觴酌潺湲臨風一長歎亂以歸來篇

温湯

在醉石南二里

連山西南來中斷還崛起干霄幾千仞據地三百里飛峯
上靈秀衆壑下清美逮茲勢力窮猶能出奇偉誰燃丹黃
燄爨此玉池水客來爭解帶萬劫付一洗當年謝康樂絃
絕今已矣水碧復流温相思五湖裏康樂湖中詩云水碧
輟流温豈未見此水

耶也

康王谷水簾

谷口景德觀在温湯西十五里入谷又十五里至簾下

循山西北驚崎嶇幾經丘前行荒蹊斷豁見清溪流一涉

臺殿古再涉川原幽縈紆復屢渡乃得寒巖陬飛泉天上
來一落散不收披崖日璀璨噴壑風颼颼追薪爨絕品瀹
茗澆窮愁敬酌古陸子何年復來游陸鴻漸茶經第此
水為天下第一

落星寺在郡城南湖中

浩浩長江水東逝無停波及此一回薄湖平烟浪多孤嶼
屹中川層臺起周阿晨望愛明滅夕遊驚蕩磨極目青冥
茫回瞻碧嵯峨不復車馬迹唯聞榜人歌我願辭世紛茲
焉老漁叢會有滄浪子鳴舷夜相過

閏月十一日月中坐彭蠡門喚船與諸人共載汎

湖至隄首回棹入西灣還分韻賦詩約來晚復集

詩不至者浮以太白簽判渺教授空知縣望吳學
錄柱掌儀明大彭兄蘭判官

擊南公一小彭兄澍彥忠人直鄉余公度漿
敬直懷衛父天埜流晦翁光泰兒美棹方

解組無多日歸哉喜欲狂臨風成邂逅載月下滄浪酌酒

傳清影鳴橈擊素光
它年隔千里此夜莫相忘

和林擇之黃雲之句兼簡同遊諸兄

登覽日云晏歸車眇重岡
天風振余旗夕露沾我裳
數子情未厭春山杳茫茫
還瞻長江白迴眺飛雲黃
當念塵中友心期邈相望
無爲跨鴻鵠決起凌青蒼

和彭蠡月夜汎舟落星湖

長占烟波弄明月此心久矣從誰說
只今一舸漾中流
下天光兩奇絕回頭忽見西郭門
尙喜蘇仙有遺烈
問子何事却回船塵土漉君頭
上雪首句全用蘇養直詩蘇舊居水西門外舟行望見其處

熹罷官觀康王谷水簾夜飲山月軒
分韻得主字
奉別送行諸君

嗟余老不才記憶謝明主
昇茲山水郡北邙通玄府
一官

再溫涼十日九塵土迨茲解章紱絕境方快覩殷勤故人
厚追送崖寺古把酒聽鳴泉相看淚如雨

游天池

三年落星渚北望天池山臨風幾浩嘆欲往無飛翰今朝
復何朝陟此青雲端高尋已奇絕俯瞰何其寬西窮濂溪
原東盡溢城關渺然滄波外淮山碧連環我意殊未極更
思出塵寰何當駕輕鴻八表須臾間視此長江水滔滔儻
西還

觀野燈

飛螢腐草尋常事作底茲山獨耀芒須信地靈資物化金
膏隨處發明光

山北紀行十二章章八句

祇役廬山陽矯首廬山陰雲峯不可覲碧澗何由尋昨朝

解印章結友同窺臨盡彼巖壑勝滿茲仁知心子以閏月

罷郡是夕出城宿羅漢二十八日宿白鹿二十九日登黃

雲觀度三峽窺玉淵憇西澗飲西原宿臥龍四月一日過

開先宿歸宗二日浴湯泉入康王谷觀水簾宿景德觀三

日與清江劉清之子澄永嘉張揚卿清叟潯陽王阮南鄉

周頤龜父長樂林用中擇之洛陽趙希漢南紀會稽陳祖

永慶長武當祁真卿師忠溫陵吳兼善仲達廬陵許子春

景陽新安胡莘尹仲建安王朝春卿長樂余隅占之陳士

直彥忠黃榦季直臨淮張彥先致遠會稽僧志南明老俱

行窺臨事若何請從圓通說逶迤山門路悄蒨倚篁列溪

仍侯家名屋是孱王設何救黍離歌喟焉傷覆轍圓通寺

溪本侯氏所居李後主取以為寺行逢石門雨解驂寒澗

東朝躋錦繡谷俯仰春冥濛懸泉忽淙琤雜樹紛青紅屢

憇小亭古幽探思無窮石門澗正在天池山下有小菴三

山道錦繡谷再過小橋橋皆竦身長林端策足層崖表仰

瞻空界闊俯歎塵寰小天池西欽蓋佛手東窈窕杖屨往

復來憑軒瞰歸鳥盡錦繡谷登山稍高無復林木坡陀而

水不竭東過佛手巖石室嵌空中有井泉僧緣崖斯須暮
結架以居下臨錦繡谷又有石榻名遠公講經臺

雲合白日無餘暉金波從地湧寶燄穿林飛僧言自雄誇

俗駭無因依安知本地靈發見隨天機天池院西數步有

是遊人請燈處僧云燈非禱不見是日不禱而光景明滅
頃刻異狀諸生或疑其妄予謂僧言則妄而此光不可誣

豈地氣之深尋兩林間清波貫華屋蓮社有遺蹤草堂非
盛而然耶

舊築脩廊餘故刻好醜雜珉玉亦復記經行深慙後人讀

五日下山至東西林兩寺相去不百步一溪清駛橫貫其
間皆自方丈前廊廡下過他處所無有也白蓮池在東林

法堂前白公草堂基在寺東久廢近歲復剏數椽制殊狹
陋然亦非其正處矣是日題名屬寺僧刻於咸通莊田記

石行軒復東驚祠城當晚遊胡然冠蓋集不盡心期幽夜

厭百谷喧旦失千峯稠出門有遺恨回首空綢繆晚至太

宮唐九天使者祠也江州教授翁名卿載酒肴與山水誠
鄉人游應和歐景文及其諸生二十餘人皆至

乃奇云誰究終始曇遠亦何人神君豈其鬼東西妄采獲

誣詔共恢詭百世踵謬訛彝倫日頽圯東林慧遠雜取孔
老之言以附佛學

嘗著沙門不敬王者論唐明皇自言親見使者降於殿庭
因立此宮而羣臣造爲妖妄以迎合者甚衆本朝仍賜宮
額神號置以茲遊覽富翻令懷抱傷誰哉可告語舉俗昏
提舉官云且狂乾坤有真心日月垂休光茫茫宇宙內此柄孰主張
北度石塘橋西訪濂溪宅喬木無遺株虛堂唯四壁竦瞻
德容晬跪薦寒流碧幸矣有斯人渾淪再開闢平生勞仰
止今日登此堂願以圖象意質之中几傍先生寂無言賤
子涕泗滂神聽儻不遺惠我思無疆六日拜濂溪先生書
堂遺像于澄請爲諸
生說太極圖義先生之曾孫正卿彥明晨江磯寺尊酒聊
卿玄孫濤爲設食于光風霽月之亭對設孰是十日遊遽成千里別英僚樹嘉政素友厲孤節
努力莫相忘清宵共明月七日薛洪持志王仲傑之才攜
酒自南康來飲罷與張陳趙南
還軍子澄許張歸廬陵南鄉龜父還家擇
之之湖南予與王余陳黃東度湖口而歸

晦庵先生朱文公文集卷第七

珍傲宋版印

考異

崇壽客舍

月向月一作上

歸未得一作是客身

分韻賦簡寂

迴矚俯一作矚

誰復復一作誰

嶺梅

似愁

但一作愁

野梅

風吹

風一作破

愁絕幽一作絕

小梅

莫嗟

莫一作歎

疎梅

不勝

不一作不成

送四十叔父

獨尋

獨一作遊

逢孤尋一作孤

祕閣張丈長篇

饋思

饋一作念

和張彥輔

失喜

饋一作喜

奉同張丈哭敬夫

喚卜

要一作卜

和白鹿洞

再吐

自一作吐

次棲賢韻

融冶

融一作結

傾耳

頌一作耳

和陶次韻 吾公吳公作

棲賢院三峽橋

條至條一作起

長蛟長一作虹

温湯

據地環一作地

山北紀行

欽釜嗟一作峨

孰是云一作是

福州府學訓導舒鏊校

晦庵先生朱文公文集卷第八

詩

買船至演平拜建康劉公墓下遂入城假館梅山
堂感涕有作

維舟新曆口步上秣陵阡高丘忽嵯峨宿草迷荒烟拜起
淚再滴哀哉不能言驅車旦復東借此虛堂眠念昔堂中
人經營幾何年一旦舍之去千秋不言還露井益清渌風
林更修鮮思公獨不見涕下如奔川感慨西州門愴恨山
陽篇晤嘆日隱樹悲歌月當軒堂堂忠孝心終古諒弗諼
尙與吳門子歸來故山巔

晚雨涼甚偶得小詩請問遊山之日并請劉平父
作主人二首

幾年不踏仙洲路夢入青藤古木間好趁新秋一番雨晝

寒亭下弄潺湲

廬阜歸來祇短筇解包茶茗粗能供若須載酒邀賓客付與屏山七老翁

宿密菴分韻賦詩得衣字

不到仙洲歲月移携壺特地款巖扉已驚素雪清人骨更喜蒼烟染客衣新賞不妨頻徙倚舊題何事獨噓噓明朝驛騎黃塵裏莫待迷塗始賦歸

讀子厚步月詩時方聞呂伯恭訃後數日賦此

晚步曲池上西風吹我裳仰觀天宇闊愛此明月光念我素心人眇焉天一方沒者永乖隔存者爲參商飄零百歲期寂寞幽鬢霜還坐三太息高林鬱蒼蒼

次子厚秋懷韻

秋風何方來爲我滌殘暑庭梧亦何與索索終夜雨冥思

感物變念此離索苦浩蕩信莫量幽紛那得覩丁年舍我去
惟悴故其所廓落濟時心頽然復安取永懷平生友夢想
見眉宇今晨枉秀句爛若朝霞舉去去同采芝高軒坐
凝佇

黎嶺西南水石佳處不減廬阜戲呈子厚

谷深石瘦水潺潺便是楞伽折桂間珍重下邳圯上客一
年幾度到廬山

讀子厚詩卷用其卒章晨起之韻作詩寄之

晝永倦殘暑宵分喜新涼天雞一振翼爛爛曉月光病榻
感虛徐中庭起翺翔懷哉穀城子物外久不忙掩抑琴調
希激烈歌聲長契闊恨清賞佳期未渠央緘詞託歸鳥側
佇何能忘

登廬峯二首

循澗躋危磴披雲得勝遊蓬茅增舊葺竹樹喜新稠夢想
三秋別徘徊十日留餘年端可料此地欲長休
佳友紛來集欣然會宿心風泉陪徙倚雲月共窺臨雅唱
情俱勝微言思獨深茲遊非逸豫邂逅得良箴

蘆峯次韻

澗水流千仞巖姿起萬般扶藜雖有興駐屐諒難安好客
能同趣羣峯肯縱觀蒼茫却無際誰與話愁端

次瑞泉詩韻

興懷來賞趣對景却忘言偶與同遊客行逢幽澗原淺泓
排積腐暗竇溢流渾終待寒泉食無憂水鏡昏

五禽言和王仲衡尙書

提胡蘆沽美酒春風浩蕩吹花柳不用沙頭雙玉瓶鳥歌
蝶舞爲君壽祇今醉是君恩昨日之愁愁殺人

不如歸去孤城越絕三春暮故山只在白雲間望極雲深
不知處不如歸去不如歸千仞岡頭一振衣

泥滑滑泥滑滑秦望雲荒鏡湖闊綠秧刺水水拍堤牙旗
畫舸凌風發使君行樂三江頭泥滑水深君莫憂

脫袴脫袴桑葉陰陰墻下路回頭忽憶舍中妻去年已逐
宅人去舊袴脫了却不辭新袴知教阿誰做

麥熟吟去年種麥有德音祇今種熟誰快活種者已臥官
墻陰仁公有政惠存歿肯使催租更隳突

酬黃子厚見訪歸途惠詩韻

櫪驥倦千里籠鶴思九臯念昔田舍日不知山林高一朝
逢世紛故丘得潛逃平生棲遁志茲焉始堅牢故人穀城
翁高情北窗陶亦復喜我歸巾車款林巢申旦更離闕中
情重物切

游密菴分韻賦詩得清字

誤落塵中歲序驚歸來猶幸此身輕便將舊友尋山去更
喜新詩取意成暖翠乍看渾欲滴寒流重聽不勝清箇中
有趣無人會琴罷尊空月四更

游密菴得空字

欲覓仙洲路須乘萬里風飲泉雲出岫臥嶺月流空永夜
渾無寐悲歌莫與同起來殘樹影清絕小樓東

昨爲許進之書胎仙字因以名其室或疑欠舞字
者故作此以解之

寒山寒月冷颼颼隻影孤桐萬里遊帝樂夢回三疊遠胎
仙舞罷一簾秋未愁悄寂無人會只恐蹣跚不自休却笑
蕊珠何處所兩忘蝴蝶與莊周

正月五日欲用斜川故事結客載酒過伯休新居

風雨不果二月五日始克踐約坐間以陶公卒章
二十字分韻熹得中字賦呈諸同遊者

玄景彫暮節青陽變暄風忽尋斜川句感此勝日逢駕言
當出遊一寫浩蕩胸雲物疑異候淒迷久連空今朝復何
朝頓覺芳景融疇曩庶復踐隣曲歡來同伊雅一籃輿連
翩數枝筇綠野生遠思清川照衰容遙瞻西山足突兀彌
畝宮庭宇豁清曠林園鬱青葱於焉一逍遙芳樽間鳴桐
既爵日樹隱班荆汀草豐纖鱗動微波新萸冠幽叢惆悵
景易晏徘徊思無窮願書今日懷遠寄柴桑翁仰止固窮
節愧茲百年中

次呂季克東堂九詠

野塘小隱

傳得希夷九卦圖歸來不復夢榮途野塘竟日無人到讀

盡床頭種樹書

敬義堂

高臺巨榜意何如
住此知非小丈夫
浩氣擴充無內外
肯誇心月夜同孤

方拙寮

一室歸來萬事新
窗間橫竹掛朝紳
九流未讓園機士
四海寧慙巧宦人

吟哦室

蒲團竹几睡曹騰
客問君今幾折肱
身世兩忘無可答
起尋詩句遶階行

愛蓮

聞道移根玉井旁
開花十丈是尋常
月明露冷無人見
獨爲先生引興長

月臺

臺上無人伴苦吟歸鴉過盡日西沉須臾玉匣開塵鏡却
有孤光共此心

菜畦

兩餘菜甲翠光勻杞菊成畦亦自春骨相定知非食肉可
能長伴箇中人

海棠屏

蜀樹成行翠作圍花開時節更芳菲主人夢亦尋春去
栩栩深穿錦障飛

橘堤

君家池上幾時栽千樹玲瓏亦富哉荷盡菊殘秋欲老一
年佳處眼中來

挽吳給事三首

臺省傾羣望江湖去一麾語聞三諫切政有百年思不盡
雲龍會還尋霧豹期誰知七休詠翻入八哀詩

粵自辭神武超然絕世紛前身疏太傅今日范忠文圃樹
寒留月湖波冷浸雲懸知千載下此地想遺芬

憶昔觀風寄登堂識老成忘年見交態把酒話詩情別去
如三歲書來忽九京却思憑檻語忍遽勒公銘

伏讀雲臺壁間祕閣郎中盤谷傳文題詩齒及賤
名追懷曩昔不勝感涕輒次元韻呈諸同遊計亦
同此歎也

提攜當日忝忘年曾向瑕丘獨請前喜看玄雲生素壁恍
疑後學廁先賢公遊汗漫今何許我病摧頽久自憐只有
空山無歲月倚天寒木但蒼然

是日景仁景初二兄行視
宅亦宿山間謹并錄呈

尤劇悲
愴耳

次韻寄題萬頃寒光奉呈休齋先生

閑將歲月老煙汀更遣詩情到杳冥
遊子故應悲舊國壯懷那肯泣新亭
一官避世今頭白萬卷收功久汗青
但見潮生與潮落不知沉醉又還醒

熹伏蒙休齋先生惠詩見留謹次高韻二首

忽驚蕭颯鬢毛秋起向泉山覓舊遊
盤谷門前淚沾臆雲臺溪上雪蒙頭
歸歟吾黨又千里老矣心期但一丘
珍重休齋書滿屋可無三宿爲君留

望望西山日幾回更憐一雨洗浮埃
遠遊莫說雲門寺往事聊尋單父臺
雞犬蕭疎迷洞口交親零落半巖隈
尊前見在君須鬪速上籃輿相逐來

用林擇之韻別陳休齋

別離不覺歲時侵兩地相望共此心
今日還成一尊酒宅

年應記百篇吟傷情後會無期定握手交情有舊深多謝
晚風知此意不催寒日下疎林

奉酬九日東峯道人溥公見贈之作

幾年回首夢雲關此日重來兩鬢斑點檢梁間新歲月招
呼臺上舊溪山三生漫說終無據萬法由來本自閑一笑
支郎又相惱新詩不落語言間

和林擇之鳳凰山韻

木落髻鬟擁湖平粧鏡空荒亡餘舊事慘澹只悲風興發
千山裏詩成一笑中諸君莫惆悵吾道固當窮

次林擇之涼峯韻

解轡林間寺歸鴉晚欲盤望中嵐翠合愁外夕陽殘尊酒
何妨盡羈心且自寬無端滿窗月遙夜不勝寒

熹去溫陵二十七年而復來顯菴益老見候七里

亭又以佳句見招而休齋陳丈寺丞黃丈皆屬和
焉因次韻奉酬併呈二丈
不因辭吏役那得解天刑故國重來遠寒山依舊青興懷
感陳迹舉目愴新亭尙喜灣頭老禪房許扣扃

答黃叔張

日君趨玉陛抗疏肅邦刑便有榮褒袞無勞涕伏青衆流
爭靡靡一柱獨亭亭只恐追鋒急那容晝揜扃

次韻陳休齋蓮華峯之作

八石天開勢絕攀算來未似此心頑已吞繚白縈青外依
舊箇中雲夢寬

次黃叔張宿涼峯韻

菡萏含跗天外秀婆娑散影月中孤惜無畫手追前輩寫
就涼峯懋寂圖

至鳳凰山再作

門前寒水青銅闕
林外晴峯紫帽孤
記得南垞通柳浪
依稀全是輞川圖

見梅用攀字韻

年來羞把玉梅攀
萬樹爭春我獨頑
只有顛狂無告訴
詩腸欲斷酒腸寬

次韻陳休齋懷古堂

平昔塵編裏
心期本自幽
那堪舊泉石
更作此追遊
好句看猶在
遺忠愴已休
亦知今日意
不逐大江流

寄題九日山廓然亭

昨遊九日山
散髮巖上石
仰看天宇近
俯歎塵境窄
歸來今幾時
夢想掛蒼壁
聞公結茅地
恍復記疇昔
年隨流水逝
事與浮雲失
了知廓然處
初不從外得
遙憐植杖翁
鶴

骨雙眼碧永獻月明中秋風桂花白

用林擇之韻呈陳福公

昔公秉鈞衡金玉我王度中年幾湖海偃息安國步歸然
九鼎重翻若孤雲去俯仰天地間誰哉此同趣

用前韻答方直甫

小儒談大方任意略權度未行要疾走踉蹌不成步唯應
過量人不作與麼去請君敝書帷爲我說歸趣

用前韻答林史君

十年劇傾馳此日際風度胡然龔黃最未接夔龍步詩成
肯遽休客醉那得去却恐驛書來湖山適成趣

題君子亭

清晨坐武觀涼風動高旌挾弓一笑起屈此四座英破的
亦已屢穿楊詎云精軍吏不敢賀高鳥時相驚解韝脫決

遂緩帶飄華纓俯仰新亭幽曠然塵慮清內正外自直三
揖奚所爭端居得深玩君子非虛名

伏承侍郎使君垂示所與少傅國公唱酬西湖佳
句謹次高韻聊發一笑二首

百年地闢有奇功創見猶驚鶴髮翁共喜安車迎國老更
傳佳句走郵童閑來且看潮頭入樂事寧憂酒斝空會見
台星與卿月交光齊照廣寒宮

越王城下水融融此樂從今與衆同滿眼芰荷方永日轉
頭禾黍便西風湖光盡處天空闊潮信來時海氣通酬唱
不誇風物好一心憂國願年豐

伏承子直都督侍郎臨錢遠郊仍邀嚴州郎中及
諸名勝相與燕集分韻賦詩熹得時字輒成鄙句

芳歲倏云晏故山風雪時胡爲在中路復此行遲遲爲有

賢主人愛客情依依昨夕西門道終宴不能辭今朝復何
朝祖帳遙相追賓從俱俊賢車馬有光輝敞扉得華觀俯
檻臨清池南州淑氣多蕩節佳景隨雪樹雖改色青山正
含姿朱氏園外谷中有梅近
百株是日花落已盡開樽酌春醪授簡哦新詩但
覺四坐驩不知寸晷移流雲暗寒空蒼煙染人衣相看暮
色至我去公當歸別袖不忍分扣扣陳苦詞願公崇令德
慰我渴與飢

臘月九日晚發懷安公父教授壽翁知丞載酒爲
別而元禮景嵩子木擇之廷老考叔舜民諸賢相
與同舟乘便風頃刻數十里江空月明飲酒樂甚
因以星垂平野闊月湧大江流分韻熹得星字醉
中別去乃得數語略紀一時之勝云

掛帆望煙渚整棹別津亭風水已云便我行安得停離樽

枉羣賢濁醪愧先傾二公廚船未至談笑不知遠但覺江

流清江水上流接建劍溪獵獵甘蔗洲茫茫白沙汀斯須

復回首祇有遙山青甘蔗白沙兩地名相過野色一以暝川

光晶孤明中流漾華月極浦涵疎星酒酣客散歸茫然獨

宵征起視天宇闊此身一浮萍難追五湖遊未願三閭醒

且詠招隱作孤舟轉岭嶼

伏蒙制置閣學侍郎示及致政少傅相公送行長

句并得竊窺酬和佳篇伏讀之餘不勝慰幸謹次

高韻少見愚悃以錢車塵伏惟采矚二首

公子威名動海濱四年相與愧情親忽聞黃鉞分全蜀更

祝彤庭列九賓公以上執手便驚成契闊贈言還喜和陽

春政成但祝歸來早別恨無端莫重陳

地兼梁益盛中權自昔疇咨出萬全定喜封章來活國故

煩伏軾去籌邊公去歲嘗有密疏軍民傳詔歡聲溢婦女

迎門巧笑妍要答君恩與人望可無清教逮初筵諸葛武侯初領

益州牧發教與羣下曰夫參署者集衆思廣忠益也若遠

小嫌難相違覆曠闕損矣違覆而得中猶棄敝躋而獲珠

玉然人心苦不能盡惟徐元直處茲不惑又董幼宰參署

七年事有不至于十反來相啓告苟能慕元直之十一

幼宰之勤渠有忠於國則亮可以少過矣又曰昔初交州

平屢聞得失後交元直勤見啓告前參事於幼宰每言必

盡後從事於偉度數有諫止雖資性鄙暗不能盡納

然與四子終始好合亦足以明其不疑於直言矣

伏讀致政少傅相公送趙成都佳句兩篇不勝慰

幸已次高韻并餞其行而再賦此章以見區區瞻

仰之意繕錄拜呈伏乞采覽二首

歸來寂莫臥漳濱夢想威容阻再親綠野遙聞花欲語赤
書還喜鴈來賓閑中有句人爭誦妙處無心物自春行馬
不因吾輩設曾奇猶得話陳陳
一旦高辭將相權身名從此慶雙全人誇迹已風塵外誰

道心遊日月邊未許前賢專晚節更將餘事發春妍君王
若要詢黃髮便好臨雍促肆筵

送彥集之官瀏陽

急景彫暮節高風振空林病夫掩關臥長謠擁孤衾聞君
千里行四牡方駸駸重此別離感青天欲愁陰君行豈不
勞民瘼亦已深催科處處急椎鑿年年侵君行寬彼吐足
以慰我心薦書會滿篋社酒還同斟所念家同產與君如
瑟琴茲焉不並駕宰木寒蕭穆尙喜吾諸甥男恭女知欽
明朝復相憶悵望楚山岑

次劉正之芙蓉韻三首

淺綠深紅出短籬望中都是可憐枝要看亂颭寒塘水更
待金風滿意吹

凌波直欲渡橫塘却愛無人獨自芳且倚新漪閑照影更

憑女伴一扶將

微吟澤畔幾扶筇自笑摧頰一秃翁羞見芙蓉好顏色且
憑詩律傲西風

晦庵先生朱文公文集卷第八

考異

晚雨涼甚

賓客賓一作去

付與分一作付

吟哦室

兩忘相一作忘

休齊惠詩次韻

忽驚蕭颯家一作不覺

老矣老一作去

珍重見一作說

三宿三一日作

望望悵一作望

遠遊勝一作遊

蕭疎迷涼悲一作荒

見在有一酒

速上好上一作

逐來趁一作來

至鳳凰山再作

銅闕銅一作闕

次韻懷古堂

已休未一作休

寄題廓然亭

俯歎俯一作視

周擇之韻呈福公

誰哉懷一作哉

次韻芙蓉

扶筇枝一作筇

大贈芙蓉

并註

福州府學訓導舒整校

鳳對文贈呈詠公

精結

喜賦

謝

大贈謝古堂

白於

至鳳凰山再

賦

畫土

登來

畫

蕭

冬重

三

筆

大齊惠

慈

步

大

兩

與

實

竹

善